

# INFIER di Dante Alighieri

PAR ME SI VA TE CITÂT INDULIADE,  
PAR ME SI VA TAL ETERNI DOLÔR,  
PAR ME SI VA FRAMIEÇ DE INT DANADE. 3

JUSTIZIE E MOVÈ IL GNO ALT CREADÔR:  
ME MI À FATE LA DIVINE POSSANCE,  
LA PLUI GRANDE SAPIENCE E IL PRIN AMÔR. 6

PRIN DI ME CREADE NO FO SOSTANCE  
SE NO ETERNE, E ETERNE ANCJE JO O DURÌ.  
JENTRANT CULÌ LASSAIT OGNI SPERANCE. 9

Ma no stait a vê pôre, se us restarês cun nô o varês la sperance di jentrâ dentri al mont maraveôs di un tai plui grans capolavôrs de leterature mondiâl. Setembar, 1321. Dante Alighieri al finîs la sô vite cence forsit savê di vê lassât in ereditât une opare mestre di un valôr leterari cence misure: la sô Commedia, plui indenant clamade Divina. Trê cantichis plenis di storiis, figuris, simbui di straordenarie fuarce. Prime cantiche, Infier. Viaç intal precipizi di un gorc profont di murî, cu la forme di un conî segnât da nûf cerclis, un plui piçul di chel altri fin insom là che al è Lucifero, implantât tal cûr de tiere. E je la prime part dal viaç di Dante par cognossi il mâl e la bestialitât dal om e il cjastî che lu spiete. Daspò, gjavât fûr da l'Infier al larà indenant su la cime dal cuel dal Purgatori, fin a rivâ intune vite gnove plene di lusôr.

Dentri e fûr da l'Infier in doi dîs: da la gnot di joibe sante dal siet di avrîl 1300 a sabide 9, insieme a la sô guide, Virgilio. Biel lunc lis balzis da l'infier, il poete a si cjate denant animis cjastiadis da la justizie divine che a i sticin dispreseament ma ca lu movin ancje a pietât come Paolo e Francesca di cui al sint il stes patiment d'amôr o come Ulisse, condanât par vê crodût di jessi nassût par "seguir virtute e canoscenza".

Da l'Infier, voltât par furlan da Pierluigi Visintin, vivarôs e prolific autôr e navigât studiôs de lenghe furlane, a si leiarà achì plui di cualchi toc.

O sin tal Bas Infier. Otâf e novesim cercli, buligants di fraudulentis, bogns di ingjanâ chei che di lôr si fidin ma ancje chei che invezit no. Pôc prime, tal cjant numar 11, Virgilio al veve clamât Dante figliuol mio. Nissun incipit miôr di chest par scomençâ.